

堪徐待後日更觀民力而處之可也○以趙希逸為禮曹叅判李顯英為大司諫嚴惺為執義俞伯曾為應教羅萬甲為修撰○戊申諫院啓曰甘浦萬戶朴夢亮當賊适犯京之日與原州中軍元克誠及武士李時蕃領兵到楊州地聞賊入城與時蕃誘脅克誠曰此正立功名之會也不可不往迎矣克誠厲聲斥之終始不許夢亮時蕃率其兵馳入城中至於叅逆璉之擒赴鞍峴之戰賊敗之後逃還厥土一道之人莫不痛嫉而只以人微地遠久致網漏公論之發亦已晚矣請夢亮時蕃按律定罪 荅曰朴夢亮等若有如此之罪則上年必無落漏之理勿為更論累啓 從之○遣內醫看完平府院君李元翼病○慶尚監司李敏求啓聞請擇有名望新進文官各置提督於都會府委以作成之責事下禮曹而不果行○以李蔡為承政院同副承旨俞伯曾為議政府舍人○三月朔己酉夜北方艮方異方有氣如火光○毛都督移咨請鑄錢通貨備局以為不可卒然行用不許然都督因此屢求銅鐵○庚戌平安道昌城一境癘疫大熾戍卒多死邊臣以聞遣醫官賁藥往救○司憲府囚貞明公主宮奴是時公主方營第宅大起土木之役運石轉木絡繹道路縶其宮奴拔人墻砌至於辱及士族婦女故憲府不待論啓直囚其宮奴人多快之皆以洪柱元年少